

Presentât a Udin il gnûf laboratori interatîf di didatiche, un strument digjitâl flesibil par pandi la lenghe, finanziât de Arlef e ideât de cooperative Centri di linguistiche aplicade Agnul Pitane.

# Lenghis par insegnâ



Une des affermazioni plui comunis fatis cuant che si fevele di insegnament de lenghe furlane e je "A coventarressin plui imprescj par insegnâ il furlan". Propit par rispindi a cheste necessitât la cooperative "Centri di linguistiche aplicade Agnul Pitane" ([www.claap.org](http://www.claap.org)) e à ideât "Lenghis" un laboratori di didatiche interatîf. Si trate di un program informatic che al va a insiorâ la propueste didatiche par furlan e pal furlan.

Finanziât de Agenzie regionâl pelenghe furlane, 'Lenghis' al met a disposizion dal insegnament de lenghe furlane un strument digjitâl, flessibil tal podê jessi doprât in maniere didatiche, svelte e che si pues pandi in maniere facile a

traversi de rê, superant i coscj di difusion dai sussidiaris in cjarte.

Dilunc de presentazion che e je stade joibe ai 12 di Novembar dopomisdì tal auditorium de Region a Udin, e je stade dade dimostrazion des diversis pussibilitâts di esercizi e svilup di chest gnûf imprest didatic, che al sarâ cumò presentât intune schirie di aponaments sul teritori.

## PATRIMONI CULTURÂL

"Lenghis al insiore il patrimoni culturâl dal Fvj stant che al jude il dialic tra lis diversis lenghis e int miore lis oportunitâts di cognossince. - e à declarât la assessore regionâl ae istruzion, **Loredana Panariti**, presinte pe ocasion - La

pussibilitât di slargjâsi fra vocabolari, traduzion, scolte, variantis locâls e struments didatics e coventarâ a vè plui cussience de lenghe che si è daûr a doprâ e e ufrirà un spazi une vore util di relazion e di aprofondiment a students e insegnants e a ducj chei che a varan la curiositât di sperimentâ un program viert, moderni e interessant".

A jerin presints ancje **Paola Floreancig**, ispetore dal Uffici scolastic regionâl dal Fvj, **Adriano Ceschia**, ideadôr dal projet e **Lorenzo Fabbro**, president de ARLeF che al à spiegât "Cun chest projet, la Agenzie, la Region e l'Usr a vuelin dâ un contribût in plui ae domande dai insegnants di podê doprâ struments didatics modernis, di difusion facile e, carateristiche preseose in cheste fase, che si puedin modulâ daûr des competencis sedi dai arlêfs che dai insegnants".

'Lenghis', che si dopre tai laboratori informatics des scuclis o tes singulis aulis par mieç de lavagne luminose o dal videoproietôr, al è pensât in primis pal insegnament de lenghe furlane, ma al pues jessi doprât par ogni lenghe e alfabet: la lenghe furlane e pues jessi associate ae lenghe taliane o a ogni altre lenghe. In particolâr, la lenghe furlane e pues jessi tratade te forme de coine o lenghe comune o te forme di une des sôs variantis gjeografichis internis.



ilfriuli@ilfriuli.it

## BANTS TRIENÂI

### Pe promozion dal furlan 211mil euros

La Arlef (la Agenzie regionâl pe lenghe furlane) e met a disposizion, cun doi bants trienâi di pueste, 211mil euros pe promozion de lenghe furlane tai setôrs de editorie e de ricercje scientifiche. Tal detai: 53mil euros a saran destinâts aes ativitâts informativis di cualitât, in lenghe furlane, des emittentis radiofonichis; 53mil euros pes emittentis televisivis; 53mil euros pai audiovisifs realizâts di produtôrs indipendents; 30mil euros pe realizazion di rivistis par fruts; 20mil euros pe organizazion di cors di lenghe furlane e 2mil euros pe realizazion di prodots tecnologjics (app, software e v.i.) cun chê di difondi la lenghe furlane.

Lis domandis a àn di rivâ li de Arlef dentri dal tiermin massim des 12 dai 25 di Novembar dal 2015. I bants e i modui pe presentazion des domandis di finanziament a puedin jessi discjamâts dal sît [www.arlef.it](http://www.arlef.it), sezion bants-garis-avis. Par altris informazions: tel. 0432.555812, [arlef@regione.fvg.it](mailto:arlef@regione.fvg.it).

## SCOLTADIS DI DRIUS

### Pocje memorie

Partide di briscule: "Cemût ise lade a finile?"

"No sai. Cuand ch'ò piârto no ten a ments".



Euronews informa

# Biodiversitât, l'Ort Botanic prin in region si candide a jentrâ in te rê taliane des bancjis pe conservazion des plantis

Il storic Ort Botanic di vie Urbanis a Udin si candide a jentrâ te rê taliane des bancjis dal germoplasme (Progetto Ribes) pe conservazion in lûcs preparâts di pueste de flore spontanee. La struture che la Provincie di Udin e à ricua-lificât di plante fûr e prontade pe ativitât didatiche e divulgative metintle tal Servizi agricoltura dal Ent tant che unitât operative a tacâ dal 2012, si prone a diventâ, di fat, la prime realtât regionâl a jessi cjapade dentri di un impuartant network nazionâl indreçât a la conservazion ex situ di germoplasme locâl, ven a stâi semencis, calmelis di speciis vegetâls dal lûc. La partecipazion a cheste rê e rapresente un mieç impuartant par permeti al teritori di tignî di cont materiâl che al riscje di spârî di cheste tiere. L'Ort Botanic di Udin cun che-



ste partecipazion si propon di lavorâ propri in cheste direzion. "L'ingrès dal Ort Didatic te rê Ribes - al spiegh e assessôr provinciâl a la Agricoltura Leonardo Barberio - al rapresente pe Provincie di Udin un obietîf impuartant tal percors di recupear di cheste storiche realtât logade tal centri studi dal Cjâf lûc furlan. Il fin al è chel di valorizâ la struture tant che unitât operative metode in prime linie intal tignî

di cont lis nestrîs plantis autoctonis e il nestrî patrimoni vegetâl sei in ambit naturalistic sei agricul. L'ingrès inte rê Ribes al metarâ un sigil su chest percors che al à puartât l'Ort a nivei di avanguardie par speciis tignudis di cont, projects inviâts e relazions cun altris struturis. In chescj agns, la struture e à inviât une impuartante ativitât di conservazion metode dongje ae didatiche e ae divulgazion doprant i laboratoriis

e i imprescj scientifics che a son rivâts dongje tai ultin agns; une vore a son stadis lis colaborazions e lis convenzions metudis sù (l'Ort botanic di Padue, la Universitât dai Studis di Udin e i istitûts scolastics superiôrs, ma ancje cu l'Ersa e vie indevant) che a garantissin la pussibilitât ai students che lu frecuentin di meti in vore lezions dant lôr didatiche metode dongje a la osservazion scientifiche.

La ativitât di studi dal Ort botanic cumò si sta concentrant su lis speciis alpinis che si cjanin te oasi di Bordaglia - For di Voltri (al è stât fat un censiment di flôrs di pueste) e inte aree des torberis basis alcalinis di Talmassons dulà che, ancje in colaborazion cu la Region e cui Comuns interessâts, a vignaran metûts in vore projects didatics specificis.